

竹書紀年集證

竹書紀年集證卷四十

江都陳逢衡學

頃王 匡王 定王 簡王

頃王

原註
名壬

元年癸卯

前編
同

衡案頃王元年據十二侯表爲魯文公九年齊昭公

十五年晉靈公二年秦康公三年楚穆王八年宋成

公二年衛成公十七年陳共公十四年蔡莊公二十

八年曹共公三十五年鄭穆公十年燕襄公四十年

上六年彗星入北斗

史記十二諸侯年表頃王十六魯文公十四彗星入北
斗。志疑案春秋書孛史于此表及天官書改作彗
而齊世家又改孛作彗攷穀梁傳云孛之爲言猶彗
則彗卽是孛左氏昭十七年星孛于辰傳申須謂彗
所以除舊布新今除于火公羊傳三稱孛者何彗星
也則彗亦卽是孛故劉向封事仍天官書言春秋彗
星三見漢五行志杜注左傳郭釋爾雅俱以彗孛爲
一然晏子春秋載齊景公睹彗星使伯常騫禳之晏

子曰孛又將出彗星之出庸何懼齊世家引晏子曰
彗星將出彗星何懼晉天文志序妖星一彗星二孛
星偏指爲彗芒氣四出爲孛其災孛甚於彗漢書文
穎注孛星光芒短其光四出蓬蓬孛孛然彗星光芒
長參參如掃帚柯氏考要引革象新書日之精變爲
孛月之精變爲彗則是判然兩星特其類似而占同
爾豈可混乎

孫之騷曰河圖帝通紀曰彗星者天之旗杜解補正
曰北斗人君象孛星亂臣象于大辰于東方皆不言

入此其言入者何穀梁子曰斗有環域也

統箋案星傳曰北斗九星在紫微西垣外第一曰天
樞二曰天璇三曰天璣四曰天權五曰玉衡六曰闈
陽七曰搖光又一星曰弼在第七星右不見又一星
曰輔在第六星左常見春秋魯文十四年秋七月有
星孛入于北斗周内史叔服曰不出七年宋齊晉之
君皆將死亂後十六年宋襄夫人使昭公田孟諸而
弑之十八年齊閻職及邴歆弑懿公于申池宣公二
年晉趙穿弑靈公于桃園以甲子計之魯文公元年

乃周襄王二十六年也至于文公十四年則襄王崩
後七年事矣韋昭洞記曰頃王六年彗星入北斗晉
趙盾率諸侯平周亂立王子樊是爲匡王時竹書未
出而所云若是則紀年信不誣矣但匡王名班韋乃
云樊未知何据又孝經鉤命決曰周襄王不能事其
母孛入北斗不知爲頃王六年事矣

鄭環曰劉歆曰斗天之三辰綱紀星也宋齊晉天子
方伯中國綱紀故當之也斗七星故曰不出七年

史記晉世家靈公八年周頃王崩公卿爭權故不赴
晉使趙盾以車八百乘平周亂而立匡王

衡案統箋脫去王陟二字韓本列于彗星入北斗前
又冠秋七月三字於彗星上以左傳頃王崩于魯文
公十有四年春當繫于首不知紀年王陟例書于末
趙本洪本俱從舊今仍之史記十二侯表於頃王五
年書頃王崩又於六年書公卿爭政故不赴既不以
此年屬頃又不以此年屬匡是踰年天下無君矣當
從本紀作六年爲是前編六年王崩子班踐位

匡王

原註
名班

元年巳酉

前編
同

衡案匡王元年據十二侯表爲魯文公十五年齊懿
公元年晉靈公九年秦康公九年楚莊王二年宋昭
公八年衛成公二十三年陳靈公二年蔡莊公三十
四年曹文公六年鄭穆公十六年燕桓公六年

六年晉靈公爲趙穿所殺趙盾使穿迎公子黑臀于周立
之

春秋宣二年秋九月乙丑晉趙盾弑其君夷臯

左傳晉靈公不君厚斂以雕墻從臺上彈人而觀其
辟丸也宰夫胹熊蹯不熟殺之寘諸畚使婦人載以
過朝趙盾士季見其手問其故而患之將諫士季曰
諫而不入則莫之繼也會請先不入則子繼之三進
及溜而後視之曰吾知所過矣將改之稽首而對曰
人誰無過過而能改善莫大焉詩曰靡不有初鮮克
有終夫如是則能補過者鮮矣君能有終則社稷之
固也豈惟羣臣賴之又曰衮職有闕惟仲山甫補之
能補過也君能補過衮不廢矣猶不改宣子驟諫公

患之使鉏麇賊之晨往寢門闕矣盛服將朝尙早坐而假寐麇退歎而言曰不忘恭敬民之主也賊民之主不忠棄君之命不信有一於此不如死也觸槐而死秋九月晉侯飲趙盾酒伏甲將攻之其右提彌明知之趨登曰臣侍君宴過三爵非禮也遂扶以下公嗾夫獒焉明搏而殺之盾曰棄人用犬雖猛何爲闕且出提彌明死之初宣子田於首山舍于翳桑見靈輒饑問其病曰不食三日矣食之舍其半問之曰宦三年未知母之存否今近焉請以遺之使盡之而爲

之簞

與食

肉寘諸橐以與之既而與爲公介倒戟以禦

公徒而免之問何故對曰翳桑之餓人也問其名居
不告而退遂自亡也乙丑趙穿攻靈公於桃園宣子
未出山而復太史書曰趙盾弑其君以示於朝宣子
曰不然對曰子爲正卿亡不越竟反不討賊非子而
誰宣子曰嗚呼我之懷矣自貽伊戚其我之謂矣孔
子曰董狐古之良史也書法不隱趙宣子古之良大
夫也爲法受惡惜也越竟乃免宣子使趙穿逆公子
黑臀于周而立之

晉語靈公虐趙宣子驟諫公患之使鉏麇賊之晨往則寢門辟矣盛服將朝早而假寐麇退歎而言曰趙孟敬哉夫不忘恭敬社稷之鎮也賊國之鎮不忠受命而廢之不信享一名于此不如死觸庭之槐而死靈公將殺趙盾不克趙穿攻公于桃園逆公子黑臀而立之是爲成公

前編匡王六年晉趙盾弑其君靈公迎襄公弟黑臀於周立之。○金履祥曰案左氏引孔子曰董狐古之良史也書法不隱趙宣子古之良大夫也爲法受惡

惜也越竟乃免此非夫子之言也方靈公欲殺趙盾至于伏甲攻之盾力鬪而出亡而趙穿攻靈公于後穿何怨于公而爲此是必有所受命矣盾非果奔也故未出山實使穿也故不討賊夫子書法因董狐之舊豈又爲是言乎而反爲趙盾謀也且盾成弑君之故矣縱使越境又可免於弑逆之罪乎以是知夾非夫子之言也

三墳補逸春秋書趙盾弑其君而紀年書晉靈公爲趙穿所殺趙穿迎公子黑臀于周立之夫趙盾書弑

董狐筆也今書果晉史乎曰此所以爲晉也董狐一
時之筆盾知其不可奪也姑釋之以示有容夫趙氏
世爲上卿終裂晉國若武若鞅無恤輩能令厥祖終
被斯名而覲然人面大惡之後乎孫盛直書晉事曾
不崇朝而晉之史氏能世執董狐之筆哉故吾于其
易盾以穿而夾其爲晉國之史無惑也至厲公之弑
則并没其事直以卒書又有甚于靈者其爲晉國之
史益彰彰矣他國則第仍董狐之舊故魯史書盾弑
而仲尼從之蓋他國于趙無忌而趙氏子孫亦第能

改其本國而已晉弑其君州蒲疑亦晉史之舊竹書
改之

孫之駮曰國語單襄公曰吾聞晉成叔之生也其母
夢神規其臀以墨曰使有晉國三而昇驪之孫故名
之曰黑臀是爲成公

鄭環曰春秋趙盾弑其君夷臯董狐直筆聖人不能
易而盾易之以赴諸侯故紀年不書盾書穿不書弑
書殺其曲甚矣後人因左氏越竟乃免之言遂與許
世子止弑其君買俱有恕詞愚謂盾卽越竟止卽嘗

藥弑之名亦不能免也瘡非卽死之症而藥進自世子飲之而卒其卒甚暴世子雖嘗藥而哭泣之哀嗷不容粒其遂能免此惡名耶河曲之役穿曰我不知謀將獨出且坐軍門而呼恃盾也放胥甲父于衛而穿不放盾庇之也盾踏階而走何以不出山穿受意于盾而盾遲遲以待其弑也司馬昭殺成濟雖討賊亦不免于弑志在于篡也盾雖無昭之志而不討穿是樂于穿之弑與手刃無異也不討而使之逆黑臀恐新君之討逆之則必免于討也能使之逆豈不能

使之弑卽未嘗使之弑而穿之敢于弑恃有盾以庇之也然則弑君者非盾而誰耶

衡案紀年一書固不如春秋遠甚然細玩此條則所謂微而顯者亦未嘗不可于言外得之也其曰晉靈公爲趙穿所殺志實也書手刃也其曰趙盾使穿迎公子黑臀于周立之見黑臀之迎爲盾使則靈公之殺亦必有使之者矣意在言外使人自得

王陟

前編六年十月王崩弟瑜立

統箋案春秋宣二年冬十月乙亥天王崩舊本竹書以趙穿弑靈公在王陟之下今依春秋傳冬不當在秋前也故改正之

定王

原註名瑜

史記周本紀匡王六年崩弟瑜立是爲定王。志疑按通志以瑜爲匡王子非也定王之名國語韋注作掄宋庠補音云或本作渝人表又作榆未知孰是

元年乙卯

前編同○原註晉成公元年

衡案定王元年據十二侯表爲魯宣公三年齊惠公

三年晉成公元年秦其公三年楚莊王八年宋文公
五年衛成公二十九年陳靈公八年蔡文公六年曹
文公十二年鄭穆公二十二年燕桓公十二年

六年晉成公與狄伐秦獲謀殺之絳市六日而蘇

左傳宣八年春白狄及晉平夏會晉伐秦晉人獲秦
謀殺諸絳市六日而蘇

史記秦本紀桓公三年晉敗我一將。志疑案晉世
家作虜秦將赤攻年表書獲謀卽左傳宣八年殺秦
謀之事也索隱云赤卽斥謂斥候之人彼謀卽此赤

也然既稱爲謀不得號曰將欲稱爲將不得復曰赤
豈秦將名赤者詐爲細作而被晉獲之歟史必別有
所据故紀表世家所書各異蓋互見耳

七年晉成公卒于扈

衡案春秋宣九年九月晉侯宋公衛侯鄭伯曹伯會
于扈晉荀林父帥師伐陳辛酉晉侯黑臀卒于扈左
傳會于扈討不睦也陳侯不會晉荀林父以諸侯之
師伐陳晉侯卒于扈乃還公羊扈者何晉之邑也諸
侯卒其封內不地此何以地卒于會故地也史記晉

世家七年成公與楚王爭彊會諸侯于扈陳畏楚不
會晉使中行桓子伐陳因救鄭與楚戰敗楚師是年
成公卒子景公據立前編亦云卒于定王七年與紀
年合

八年

原註王戌晉
景公元年

衡案是年提行大字蓋專爲晉景紀元而設與簡王
六年爲晉厲公元靈王十五年爲晉平公元景王二
十年爲晉頃公元敬王九年爲晉定公元元王二年
爲晉出公元貞定王十八年爲晉敬公元安王十年

爲晉桓公元同其紀于前者則宣王四十四年爲晉
殤叔元桓王三年爲晉哀侯元十五年爲晉侯緡元
襄王二十五年爲晉襄公元三十二年爲晉靈公元
此皆專爲晉紀年而書餘俱有事附列

十八年齊國佐來獻玉磬紀公之獻

春秋成二年六月癸酉季孫行父臧孫許叔孫僑如
公孫嬰齊帥師會晉卻克衛孫良夫曹公子首及齊
侯戰于鞍齊師敗績秋七月齊侯使國佐如師己酉
及國佐盟于袁婁

孫之駮曰杜預曰卽左傳賓媚人來致賂也媚人國
佐也甗玉磬皆滅紀所得左莊四年紀侯被偪去國
齊收其民人取其國寶國佐齊卿國歸父之子國武
子也鄭衆注考工記云甗無底甗方言曰甗自關而
東謂之甗

衡案是役也季孫行父禿晉郤克眇衛孫良夫跛曹
公子首僂同時而聘于齊齊使禿者御禿者眇者御
眇者跛者御跛者僂者御僂者蕭同叔子處臺上而
笑之聞于客當是時諸大夫皆怒而郤子爲尤甚已

而孫桓子如晉乞師臧宣叔亦如晉乞師皆主卻獻
子晉侯許之七百乘請益子八百乘卻克將中軍士
燮佐上軍欒書將下軍韓厥爲司馬魯衛曹諸國亦
俱以師從師進至靡笄之下齊侯請戰越日陳于鞍
兵旣接齊侯奔晉師不介馬而馳之晉解張御卻克
鄭邱緩爲右齊萬矢並集矢貫于御之肘卻克傷幾
不能軍張侯曰師之耳目在吾旗鼓擐甲執兵固卽
死也左並轡右援枹而鼓馬逸不能止當是時幾敗
于齊者數矣晉師不知其馬逸也疑以爲旣勝齊師

矣乘之齊師敗逐之三周華不注韓厥中御而從齊
侯將及逢丑父者齊侯之車右也面目與頃公相似
衣服與頃公相似以計逸齊侯去韓厥誤以丑父歸
齊侯復入求丑父三出三入終不得丑父乃退自徐
關入晉師從齊師入自邱輿擊馬徑齊侯請平使賓
媚人賂以紀甌玉磬反魯衛之侵地不可則聽客之
所爲賓媚人致賂卻獻子不可曰必以蕭同叔子爲
質而使齊之封內盡東其畝然後可對曰蕭同叔子
非他寡君之母也若以匹敵則亦晉君之母也吾子

布大命于諸侯而曰必質其母以爲信其若王命何
且是以不孝令也先王疆理天下物土之宜而布其
利今吾子曰盡東其畝而已唯吾子戎車是利其無
乃非先王之命也乎不然寡君之命使臣則有辭矣
曰子以君師辱于敝邑不腆敝賦以犒從者唯是先
君之敝器土地不敢愛子又不許請收合餘燼背城
借一一不勝請再再不勝請三三不勝則齊國盡子
之有也何必以蕭同叔子爲質揖而去卻克眈魯衛
之使使以其辭爲之請然後許之逮于袁婁而與之

盟此事左公穀俱載余爲截錄之如此

二十一年王陟

統箋案是年乙亥

春秋成五年冬十有一月己酉天王崩

史記周本紀二十一年定王崩子簡王夷立

前編二十有一年王崩子夷踐位

簡王

原註名夷

元年丙子

前編同

衡案簡王元年據十二侯表爲魯成公六年齊頃公十四年晉景公十五年秦桓公十九年楚其王六年

宋共公四年衛定公四年陳成公十四年蔡景侯七年曹宣公十年鄭悼公二年燕昭公二年吳壽夢二年

五年晉景公卒

春秋成十年丙午晉侯孺卒

左傳晉侯夢大厲被髮及地搏膺而踊曰殺余孫不義余得請於帝矣壞大門及寢門而入公懼入於室又壞戶公覺召桑田巫巫言如夢公曰何如曰不食新矣公疾病求醫於秦秦伯使醫緩爲之未至公夢

疾爲二豎子曰彼良醫也懼傷我焉逃之其一曰居
盲之上膏之下若我何醫至曰疾不可爲也在盲之
上膏之下攻之不可達之不及藥不至焉不可爲也
公曰良醫也厚爲之禮而歸之六月丙午晉侯欲麥
使甸人獻麥饋人爲之召桑田巫示而殺之將食張
如廁陷而卒小臣有晨夢負公以登天及日中負晉
侯出諸廁遂以爲殉

史記晉世家十九年夏景公病立其太子壽曼爲君
是爲厲公後月餘景公卒

前編簡王五年晉侯有疾立世子州蒲爲君以會齊侯宋公魯侯曹伯伐鄭晉景公卒

六年

原註辛巳晉厲公元年

史記十二諸侯年表簡王六晉厲公壽曼元年。志疑案厲公之名年表世家作壽曼春秋及成十年左傳作州蒲應劭諱議云周穆王名滿而有王孫滿晉侯州滿釋文云州蒲或作州滿劉知幾以蒲爲誤則知壽曼卽州滿曼滿音相近壽州字相通觀古酬作醕可見而滿蒲二字書傳中往往又以形近相亂如

左傳襄廿七年盧蒲癸呂氏春秋慎行篇作盧滿癸
定五年秦將子蒲楚策作子滿史記秦紀秦將到滿
正義謂滿或作蒲封禪書蒲池顏籀謂或作滿春申
君傳蒲衍新序善謀篇作滿衍漢書高帝紀魏將武
滿史作武蒲司馬相如傳苞蒲作苞滿後書光武紀
上蒲陽順帝紀蒲陰注謂或作滿王昌傳將軍鄧滿
注引續漢書作蒲列子湯問篇蒲且子張衡傳作滿
且莊子天地篇有人名赤張滿稽釋文云滿或作蒲
可以類證矣

十三年晉厲公卒

孫之騶曰厲公既殺三郤樂書中行偃懼誅執厲公而殺之于匠麗氏大戴記厲公以見殺于匠黎之宮五行志單襄公見晉厲公視遠步高告魯侯曰晉將有亂晉君之容殆必禍者也後二年晉人殺厲公淮南子昔晉厲公南伐楚東伐齊西伐秦北伐燕兵橫行天下而無所絀威服四方而無所絀遂合諸侯于嘉陵氣充志滿淫侈無度暴虐萬民內無輔拂之臣外無諸侯之助戮殺大臣親近導諛明年出遊匠驪

晉書卷一百一十一 卷四十一
氏樂書中行偃劫而幽之三月而死

衡案春秋成公十有八年春王正月晉殺其大夫胥
童庚申晉弑其君州蒲左傳晉樂書中行偃使陳滑
弑厲公葬之於翼東門之外晉語長魚矯既殺三郤
乃脅樂書中行而言于公曰不殺此二子者憂必及
君公曰一日而尸三卿不可益也三月厲公弑史記
晉世家厲公囚十日死是州蒲之弑自麟經至諸說
無異而紀年獨以卒書其背經甚矣然當是時樂書
中行之勢十倍于盾爲晉史者能毅然秉筆直書乎

本紀及前編俱列之簡王十三年與紀年合

楚共王會宋平公于湖陽

孫之騶曰水經注湖陽縣故城南故蓼國也蓼國今
義陽縣東南湖陽城一云蓼楚得其地謂之湖陽史
記沛公攻湖陽下之漢爲縣屬南陽郡杜預曰蓼國
今安豐蓼縣

衡案共王楚子審也平公宋共公少子成也先是宋
臣華元善楚令尹子重又善于欒武子兩盟晉楚交
贄往來道路無壅故宋與楚連和及是又會于湖陽

繼舊好也然春秋紀成十六年夏楚子鄭伯伐楚宋魚石復入于彭城冬楚人鄭人侵宋則此會必在宋楚構兵之先湖陽故蓼國也隸南陽郡見漢書地理志又水經注泚水逕湖陽縣故城南竹書紀年曰楚其王會宋平公子湖陽者矣

十四年

原註己丑晉
悼公元年

統箋案悼公名周其大父捷晉襄公少子也號爲桓
叔子惠伯談生悼公周

王陟

春秋襄元年九月辛酉天王崩

杜氏曰辛酉九月十五日

前編十有四年九月王崩太子泄心踐位

竹書紀年集證卷四十終

竹書紀年集證卷四十

末

竹書紀年集證卷四十一

江都陳逢衡學

靈王 景王 敬王

靈王

原註
名泄

史記周本紀十四年簡王崩子靈王泄心立。志疑
案靈王之名周語韋註亦作大心

統箋案周本紀初定王六年秦人降妖曰周其有顛
王亦能克修其職諸侯服享故靈王亦稱顛王

元年庚寅

前編
同

衡案靈王元年據十二侯表爲魯襄公二年齊靈公
十一年晉悼公二年秦景公六年楚共王二十年宋
平公五年衛獻公六年陳成公二十八年蔡景公二
十一年曹成公七年鄭成公十四年燕武公三年吳
壽夢十五年

十四年晉悼公卒

統箋案春秋襄公十五年冬十有一月癸亥晉侯周
卒

史記晉世家悼公十五年卒子平公彪立

十五年

原註甲辰晉
平公元年

統箋案史記年表亦以是年爲甲辰靈王二十一年
魯襄公二十二年孔子生歲在己酉据竹書則己酉
是靈王二十年魯襄公二十一年也公羊傳襄公二
十一年十月庚辰朔十有一月庚子孔子生何休註
曰時歲在乙卯又曰何氏自有長曆不得以左氏難
之然据竹書則魯襄公二十一年歲在己酉何云乙
卯當從竹書及年表孔子生己酉歲自文王旣沒至
此共五百一十二年

二十七年王陟

春秋襄二十八年十有二月甲寅天王崩

左傳癸巳天王崩未來赴亦未書禮也王人來告喪問崩日以甲寅告故書之以徵過也

前編二十有七年王崩太子晉母弟貴踐位

孫之驟曰皇覽曰靈王冢在河南城西南栢亭西周山上以靈王生而有髭而神故諡靈王其冢民祀之不絕

景王
原註
名貴

孫之駿曰靈王崩太子晉早卒周書太子晉解王子
曰吾後三年上賓於帝所註云王子年十七而卒也
案列仙傳云王子喬者周靈王太子晉也道人浮邱
公接以上嵩高山次子貴立是爲景王

統箋案周本紀靈王崩子景王貴立韋昭曰太子晉
之弟也

元年丁巳

前編
同

衡案景王元年據十二侯表爲魯襄公二十九年齊
景公四年秦景公三十三年楚熊郊敖元年宋平公

三十二年衛獻公

後元

三年陳

哀公

二十五年蔡景侯四

十八年曹武公十一年鄭簡公二十二年燕惠公元

年吳餘祭四年

十三年春有星出婺女

孫之駮曰婺女下九尺爲七政之中道一名須女客
星犯女國有女亂

統筭案星傳婺女四星十一度在牽牛東北距西南
星去極一百四度半漢書李尋傳臣聞五行以水爲
本元武婺女天地所紀終始所生子孟康曰婺女須女

也張揖廣雅曰須女謂之婺女左傳昭十年春王正月有星出於婺女鄭裨竈言於子產曰七月戊子晉君將死今茲歲在顓頊之虛姜氏任氏實守其地居其維首而有妖星焉告邑姜也邑姜晉之妣也天以七紀戊子逢公以登星斯於是乎出吾是以譏之杜註客星出非其地故曰妖星也唐志歲星差合術曰昭公八年十一月楚滅陳史趙曰未也陳顓頊之虛也歲在鶉火是以卒滅今在析木之津猶將復由開元書在箕八度析木津也十年春進及婺女初在元

枵之維首傳曰有星孛於婺女是也

衡案晉平公以近女室致疾故有星出婺女之象

十月晉平公卒

衡案十月當作七月古十七字多訛十二侯表景王十三晉平公二十六十月公薨

亦誤以七月爲十月

左傳昭元年晉侯有疾鄭伯使公孫僑如晉聘且問疾叔向問焉曰寡君之疾病卜人曰實沈臺駘爲祟史莫之知敢問此何神也子產曰昔高辛氏有二子伯曰闕伯季曰實沈居于曠林不相能也日尋干戈以相征討后帝不臧遷闕伯于商邱主辰商人是因

故辰爲商星遷實沈于大夏主參唐人是因以服事
夏商其季世曰唐叔虞當武王邑姜方震大叔夢帝
謂已余命而子曰虞將與之唐屬諸參而蕃育其子
孫及生有文在其手曰虞遂以命之及成王滅唐而
封大叔焉故參爲晉星由是觀之則實沈參神也昔
金天氏有裔子曰昧爲元冥師生允格臺駘臺駘能
業其官宣汾洮障大澤以處大原帝用嘉之封諸汾
川沈姒蓐黃實守其祀今晉主汾而滅之矣由是觀
之則臺駘汾神也抑此二者不及君身山川之神則

水旱癘疫之災於是乎禱之日月星辰之神則雪霜
風雨之不時於是乎禱之若君身則亦出入飲食哀
樂之事也山川星辰之神又何爲焉僑聞之君子有
四時朝以聽政晝以訪問夕以修令夜以安身於是
乎節宣其氣勿使有所壅閉湫底以露其體茲心不
爽而昏亂百度今無乃壹之則生疾矣僑又聞之內
官不及同姓其生不殖美先盡矣則相生疾君子是
以惡之故志曰買妾不知其姓則卜之違此二者古
之所慎也男女辨姓禮之大司也今君內實有四姬

焉其無乃是乎若由是二者弗可爲也已四姬有省
猶可無則必生疾矣叔向曰善哉胙未之聞也此皆
然矣晉侯聞子產之言曰博物君子也重賄之晉侯
求醫於秦秦伯使醫和視之曰疾不可爲也是謂近
女室疾如蠱非鬼非食惑以喪志良臣將死天命不
祐公曰女不可近乎對曰君子之近琴瑟以儀節也
非以惰心也天有六氣降生五味發爲五色徵爲五
聲淫生六疾六氣曰陰陽風雨晦明也分爲四時序
爲五節過則爲苗陰淫寒疾陽淫熱疾風淫末疾雨

淫腹疾晦淫惑疾明淫心疾女陽物而晦時淫則生
內熱惑蠱之疾今君不節不時能無及此乎出告趙
孟趙孟曰誰當良臣對曰主是謂矣主相晉國於今
八年晉國無亂諸侯無闕可謂良矣和聞之國之大
臣榮其寵祿任其大節有苗禍興而無改焉必受其
咎今君至於淫以生疾將不能圖恤社稷禍孰大焉
主不能禦吾是以云也趙孟曰何謂蠱對曰淫溺惑
亂之所生也於文皿蟲爲蠱穀之飛亦爲蠱在周易
女惑男風落山謂之蠱皆同物也趙孟曰良醫也厚

其禮而歸之七年鄭子產聘於晉晉侯有疾韓宣子
逆客私焉曰寡君寢疾於今三月矣並走羣望有加
而無瘳今夢黃熊入於寢門其何厲鬼也對曰以君
之明子爲大政其何厲之有昔堯殛鯀於羽山其神
化爲黃熊以入於羽淵實爲夏郊三代祀之晉爲盟
主其或者未之祀也乎韓子祀夏郊晉侯有間賜子
產莒之二方鼎十年戊子晉平公卒

晉語平公有疾秦景公使醫和視之出曰不可爲也
是謂遠男而近女惑以生蠱非鬼非食惑以喪志良

臣不生天命不祐若君不死必失諸侯趙文子聞之
曰武從二三子以佐君爲諸侯盟主於今八年矣內
無苛慝諸侯不二子胡曰良臣不生天命不祐對曰
自今之謂和聞之曰直不輔曲明不規暗拱木不生
危松柏不生埤吾子不能諫惑使至於生疾又不自
退而寵其政八年之謂多矣何以能久文子曰鑿及
國家乎對曰上鑿鑿國其次疾人固鑿官也文子曰
子稱蠱何實生之對曰蠱之慝穀之飛實生之物莫
於蠱蠱莫嘉於穀穀與蠱伏而章明者也故食穀者

伏

晝選男德以象穀明宵靜女德以伏蠱慝今君一之
是不饗穀而食蠱也是不昭穀明而皿蠱也夫文蟲
皿爲蠱吾是以云文子曰君其幾何對曰若諸侯服
不過三年不服不過十年過是晉之殃也是歲也趙
文子卒諸侯叛晉十年平公薨

史記晉世家二十六年平公卒子昭公夷立

統箋案十月誤春秋昭公十年秋七月戊子晉侯彪
卒卽用夏正亦當爲九月非十月

十四年

原註庚午晉
昭公元年

河水赤於龍門三里

通雅龍門之名不一水經注魏土地記曰梁山有龍門山大禹所遂通孟津括地志龍門在同州韓城縣北五十里近黃河禹所鑿禹貢正義云龍門在馮翊夏陽縣北禹鑿以通河東郡之西界也

衡案河水赤兆王室之亂也京房易傳曰君涸於酒淫於色賢士潛退國家危亡厥異流水赤博物志江河水赤名曰泣血

十九年晉昭公卒

春秋昭十六年秋八月己亥晉侯夷卒

史記晉世家昭公六年卒公卿彊公室卑子頃公去疾立

冬十二月桃杏花

孫之騷曰時周景王老劉子單子事王子猛尹氏召伯毛伯事王子鼂子鼂楚之出也及宋衛陳鄭亦皆外附於楚亡尊周室之心火盛水衰故桃杏冬華宋衛陳鄭災河水反赤後六年而景王崩王室亂

衡案洪範五行傳云於易巽爲風爲木卦在三月四月繼陽而治主木之華實風氣盛至秋冬木復華故

有華孽卽此類也

二十年

原註丙子晉
頃公元年

二十五年晉頃公平王室亂立敬王

韓本晉頃公上
有王陟二字

詩曹風洌彼下泉浸彼苞蘩愴我寤歎念彼京周洌彼下泉浸

彼下泉浸彼苞蕭愴我寤歎念彼京周洌彼下泉浸

彼苞著愴我寤歎念彼京師芄芄黍苗陰雨膏之四

國有王郇伯勞之。世本古義下泉曹人美晉荀躒

納周敬王也焦贛易林蠱之歸妹其繇云下泉苞蘩

十年無王荀伯遇時憂念周京今考詩與春秋事相

符合焦氏所傳確矣當從之案左傳國語及杜預韋
昭註昭二十二年周景王崩先是太子壽卒王立子
猛後復欲立子朝而未定至是單穆公旗劉文公狄
奉子猛立之子朝因舊官百工之喪職秩者與靈王
景王之子孫以作亂單子劉子奉子猛出奔冬十月
晉籍談荀躒帥九州之戎及焦瑕溫原之師將以納
王於王城已而子猛卒周人諡曰悼王者是也猛母
弟王子匄立是爲敬王晉師王師伐京圍郊子朝敗
王使人告間晉師還未幾子朝入於尹單子劉子伐

尹敗召伯奭南宮極以成周人戍尹王如劉王子朝
入於王城尹辛敗劉師尹文公圍遂立王子朝時昭
二十三年六月也於是子朝稱西王天王居於狄泉
稱東王狄泉者成周之城周墓所在杜預云今雒陽
城內大倉西南池水也時召簡公盈南宮嚳及甘桓
公俱從子朝晉侯使人蒞周問故問於介衆皆以子
朝爲曲乃辭子朝不納其使二十五年夏晉人爲黃
父之會謀王室也令諸侯之大夫輸王粟具戍人曹
人與焉其君則悼公午也期以明年納王越明年劉

師與子朝之師戰又敗王出奔次於滑七月晉荀躒
趙鞅帥師納王使女寬守闕塞十一月晉師克鞏尹
氏召伯毛伯以王子朝奔楚天王入於成周晉師使
成公般戍周而還二十七年秋復會於扈令成周也
曹人亦與焉時子朝餘黨僭扁之徒多在王城王畏
之昭三十二年劉文公與萇宏欲城成周距子朝作
亂之時十年矣案王城在灑水西周公所營以朝會
諸侯之地謂之東都今河南是也成周在灑水東周
公所營以處頑民之地謂之下都今雒陽是也天子

使告於晉曰天降禍於周俾我兄弟並有亂心

以伯爲

父憂我之二親昵甥舅不遑啟處於今十年勤戍五年余一人無日忘之昔成王合諸侯城成周崇文德焉今我欲徼福假靈於成王修成周之城俾戍人無勤諸侯用寧螫賊遠屏晉之力也其委諸伯父冬十一月晉魏舒韓不信如京師合諸侯之大夫於狄泉尋盟且城成周曹人又與焉則隱公通也至次年春竣事案此詩固美晉荀躒然亦有譏晉頃公之意焉昭二十三年經書晉人圍郊胡安國云案左氏晉籍

談荀躒帥師軍於侯氏箕遺樂徵濟師軍其東南正月二師圍郊郊子朝邑也既不書大夫之名氏又不稱師而曰晉人微之也所謂以其事而微之者也當是時天子蒙塵晉爲方伯不奔問官守省視器具徐遣大夫往焉勤王尊王之義若是乎書晉人圍郊而罪自見矣又案圍郊之後王使人告間暇於晉晉師遂還郝敬云向使晉人盡忠王室無懷二圖周惟恐晉師不畱何告間之有告間則晉之師可知也二十五年經書會於黃父高氏云自二十二年景王崩王

室之急如此豈可坐待明年哉有霸者作如齊桓公
盟首止以定王世子鄭晉文公誅叔帶以逆襄王豈
不美哉桓文不作猛朝相競王室世臣不能明先王
一定之制順非而廢適使頃公而爲桓文果至是乎
是以聖人傷王室之亂而又於此著諸侯之無霸也
春秋昭二十有二年夏四月乙丑天王崩六月叔鞅
如京師葬景王王室亂劉子單子以王猛居于皇秋
劉子單子以王猛入于王城冬十月王子猛卒二十
有三年晉人圍郊天王居於狄泉尹氏立王子朝二

十有五年夏叔詣會晉趙鞅宋樂大心衛北宮喜鄭
遊吉曹人邾人滕人薛人小邾人於黃父二十有六
年冬十月天王入於成周尹氏召伯毛伯以王子朝
奔楚二十有七年秋晉士鞅宋樂祁犁衛北宮喜曹人
邾人滕人會於扈三十二年冬仲孫何忌會晉韓不
信齊高張宋仲幾衛世叔申鄭國參曹人莒人薛人
杞人小邾人城成周

繹史讀昭公之春秋經大書曰王室亂劉子單子以
王猛居於皇明年又書曰天王居於翟泉尹氏立王

子朝爲之廢書而歎也曰寵偏之爲禍如是哉景王
初立殺弟佞夫問何以故則僖括欲立之佞夫弗知
也禍亂未形急加翦滅王之自爲謀審矣顧圖厥後
者乃弗克臧與子晉蚤死壽亦無祿儲位未定王以
暮年昏倦無社稷之良圖鑄大錢作無射乃心侈矣
殺下門子謀去單劉亂端形矣王猛以次當立子朝
庶孽有寵以故王室諸臣各思擁立於是附子猛者
則單旗劉蚩樊齊諸人也附子朝者則召盈毛將尹
固原伯魯諸人也稱兵交戰亂靡有底王猛立而尋

卒敬王嗣位益子朝所未甘心也於是大臣奉王出
奔于朝復入時則東西二王分國以處天下諸侯尚
懷疑莫知適從也南宮極震甘氏又往子朝之黨正
未衰息焉衆之所直晉亦直之會於黃父率十國之
衆力戰納王王室始定矣夫敬王之立也一年而出
四年而入入五年而諸侯城成周流離數邑龍戰五
載誰生戾階則景王之寵爲之也春秋痛而詳書首
曰王室亂在天下爲京師在國中爲王室亂自內作
故不曰京師而曰王室直若一家之辭也且王猛之

出與入也則劉單以之子朝之奸位也則尹氏立之
其奔楚也則尹氏召毛以之亂實在下上何能爲惟
單劉奉王不貳勲在盟府其子桓公武公克平餘孽
繼有成勞甘氏則父忠而子叛召盈則事朝而逆王
尹固則旣奔而旋復反復詐佞是又毛原之罪人也
昔子帶之亂齊桓爲盟而世子定晉文納王而王室
安敬王之難歷年不靖者時無霸也然晉之頃定再
世勤王孰謂非霸之餘烈哉叛臣誅於京師子朝就
戮於楚除惡庶盡乎旣而姑蕪播遷亦越時日傳固

詳記之終敬之世亦何嘗寧耶自定簡以來王室多故經不勝書故書一王札子殺召伯毛伯而周之兩下相殺者不盡書書一周公出奔楚而周臣之奔亡者不盡書書一天王居於翟泉而敬王之出與居者亦不盡書也豈惟不勝書誠亦不欲盡書哉

鄭環曰案春秋書王室亂凡五年而後定晉之功實晉之罪也景王立二十五年本紀作二十年統箋作二十三年俱誤孔子於魯昭公二十四年適周時周之亂已三年問禮者其名救亂者其志乃萇宏薦之

劉子劉以爲聖將安施而不薦之於王此所以見老
而卽返魯也周之弊在世官後世之弊在科目資格
建官惟賢位事惟能則天下治矣使周用孔子於以
朝諸侯有天下猶運於掌於定子朝之亂何有

韓怡曰世紀悼王以景王二十五年四月始卽位十
一月崩王立凡二百日故春秋稱王子猛卒不成喪
故不言天王崩紀年之不載悼王亦此意也

衡案史記周本紀景王十八年后太子聖而早卒二
十年景王愛子朝欲立之會崩子丐之黨與爭立國

人立長子猛爲王子朝攻殺猛猛爲悼王晉人攻子朝而立丐爲敬王敬王元年晉人入敬王子朝自立敬王不得入居澤四年晉率諸侯入敬王於周子朝爲臣諸侯城周十六年子朝之徒復作亂敬王奔於晉晉定公遂入敬王於周又晉世家頃六年周景王崩王子爭立晉六卿平王室亂立敬王統箋云景王立二十三年崩自是而王室亂踰二年而立敬王故竹書總計爲二十五年耳而史記之二十年誤也

敬王

原註
名句

元年壬午

前編同

衡案敬王元年據十二侯表爲魯昭公二十三年齊景公二十九年晉頃公七年秦襄公十八年楚平王十年宋元公十三年衛靈公十六年陳惠公十五年蔡悼侯三年曹悼公五年鄭定公十一年燕平公五年吳僚八年

八年晉頃公卒

衡案春秋昭三十年夏六月庚辰晉侯去疾卒史記晉世家十四年頃公卒子定公午立前編敬王八年

晉頃公卒

九年

原註庚寅晉定公元年

統箋案晉定公元年魏舒爲政定十四年晉逐范中行氏趙鞅歸於晉自是晉知氏韓氏趙氏魏氏並強分晉之勢成矣

十四年漢不見於天

孫之騷曰詩推度災曰逆天地絕人倫當夏雨雪則天漢滅

衡案天漢起東方尾箕之間謂之漢津始經龜魚傅

說天江糠星天籥斜行上連箕斗天弁河鼓左右旗
西映天市吳越自坤抵艮至宗人宗星而止其大勢
上絡天津東府造父騰蛇王良跗路閣道天船大陵
漸下而東南行又歷卷舌五車天潢天關司怪水府
入東井過四瀆天狗弧矢天社天稷在七星南而沒
則漢之炳明於天者大矣顯矣詩曰倬彼雲漢爲章
於天又曰維天有漢監亦有光夫亦謂漢之襟絡天
地而旋乾轉坤者主道在握也今乃不見於天爲亘
古得未曾有之事皇極失守斗愆於馭隳其玉柄是

謂陽潰嗚呼此又春秋將入戰國之兆也

二十六年晉青虹見

衡案鎮星之精散爲虹天地之淫氣也一曰虹者攻也陰陽相敵而生此氣彌天者也是時晉霸不振臣強於君趙保晉陽范走朝歌卒致四卿分并出公道死陽不勝陰君不勝臣蓋久矣天變於上矣

二十八年洛絕於周

水經洛水又東北過河南縣注竹書紀年晉定公二十八年洛絕於周魏襄王九年洛入成周山水大出南

有甘洛城郡國志曰所謂甘城也

三十六年淇絕於舊衛

孫本脫去三
十六年四字

水經注淇水又東出山分爲二水會立石堰過水以沃白溝左爲宛水右則淇水自元甫城東南逕朝歌縣北竹書紀年晉定公二十八年淇絕於舊衛卽此也

春秋地名考辨朝歌故衛都後爲晉邑竹書紀年謂之舊衛

三十九年晉城頓邱

統箋案水經注曰關駟云頓邱縣在淇水南又屈運
頓邱西詩所謂送子涉淇至於頓邱竹書紀年晉定
公三十一年城頓邱史記正義云頓邱故城在衛州
頓邱縣東北三十里輿地廣記頓邱本衛邑漢屬東
郡

四十二年宋殺其大夫皇瑗於丹水之上

左傳哀十七年宋皇瑗之子麋有友曰田丙而奪其
兄鄆邑以與之公執之皇瑗奔晉召之十八年春宋
殺皇瑗公聞其情復皇氏之族使皇緩爲右師

丹水壅不流

水經獲水出坂水於梁郡蒙縣北注地里志曰獲水也十三州志曰首受苗獲渠亦兼丹水之稱也竹書紀年曰宋殺其大夫皇瑗於丹水之上又曰宋大水丹水壅不流蓋坂水之變名也

孫之騷曰通雅丹水有七澤州高平縣有泣水一曰丹水漢上黨高都縣莞谷丹水所出東南流入泣水高都澤州晉城縣隋曰丹州漢丹水屬宏農郡以爲白起坑趙卒水盡赤故曰丹水山海經洛水出謹舉

山東與丹水合丹水出竹山洛合丹然後合尸水乳
水蠱尾之龍餘水陽虛之元扈水自謹舉至元扈凡
九山玉板曰倉頡爲帝南巡登陽虛臨元扈龜負丹
甲青文之圖卽此處也其內鄉縣之丹水平水經注
陰溝卽狼湯渠亦名汜水又云丹泌亂流故汜兼丹
水之稱又水經丹水出上洛冢嶺山至丹水縣入於
洧逕三戶城合於南陽之淅水其逕南鄉縣北所謂
商於之地也呂覽曰堯有丹水之戰以服南蠻此水
也竹書紀年曰宋殺其大夫皇瑗於丹水之上是獲

渠亦兼丹水之稱朱虛縣有東丹水西丹水出丹山
今作凡山訛也夷水逕夷道縣合丹水水有赤氣故
名

統箋案地鏡曰河大壅下臣執政或主大水又曰流
水忽停天下飢

四十四年王陟

史記周本紀四十二年敬王崩子元王仁立。志疑
案左傳哀十九年書敬王崩而春秋昭二十二年書
景王崩則敬王在位四十四年明甚竹書及集解引

皇甫謐說俱合此作四十二表作四十三竝誤也但

御覽八十五卷引史記作四十四年

衡案今本紀年敬王四十四與

春秋左傳合

前編四十有四年王崩太子仁踐位

孫之騷曰皇甫謐曰敬王四十四年元己卯崩壬戌也

統箋案左傳哀十九年冬叔青如京師敬王崩故也

史記年表敬王四十三年崩則少一年徐廣曰歲在

甲子從史記也據竹書則在乙丑

竹書紀年集證卷四十一終